



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

**Komunikadu Imprensa**  
**Distritu Bobonaro**  
*18 Abril 2016*

**Komunidade Suku Sanirin Distritu Bobonaro preukupa ho produtividade  
Parlamentu Nasional no kestaun imunidade impede prosesu justisa formal**

Iha 15 Abril 2016, Judicial System Monitoring Programme (JSMP), hala'o atividade treinamentu iha Suku Sanirin Sub-distritu Balibo Distritu Bobonaro.

Materia ne'ebé JSMP apresenta no diskute durante ne'e sesaun ne'e mak kona-ba demokrasia no prosesu halo lei, kna'ar no kompetensia orgaun soberania sira, prosesu halo lei no partisipasaun publiku iha prosesu halo lei.

Treinamentu ne'e partisipa hosi responsavel sira hosi estrutura Suku Sanirin. Ne'e inklui xefe aldeia, membru konsellu suku sira, representante feto rua, joven feto no mane no comunidade sira iha jerál. Partisipante sira seluk mai hosi Aldeia Cauçu, Subatiso no Palaca. Total partisipante hamutuk ema nain 30 kompostu husi feto 16 no mane 14.

Iha apresentasaun no diskusaun partisipante sira ativu hodi hatoo perguntas no lamentasaun relasiona ho kestaun produtividade iha Parlamentu Nasional. Partisipantes sira haktuir katak situasaun sira ne'e implika ba prosesu diskusaun ba esbosu lei importansia sira iha PN sai pendentu, hanesan Proposta Lei Anti-Korrupsaun, Esbosu Lei Rai, alterasaun ba Lei Pensaun Vitaliasia no lei importante sira seluk. Tuir partisipante sira katak hare ba membru Parlamentu sira nia produtividade no pezu servisu ne'e laiha balansu ho remunerasaun ne'ebé sira hetan.

Partisipante sira mós kestiona makas kona-ba kestaun imunidade tanba tuir sira kestaun ne'e bele sai hanesan impdementu ba prosesu justisa formal. Sira preokupa liutan katak imunidade ne'ebé membru governu no parlamentu sira iha hanesan previleju ida ba sira atu sira livre hodi komete krime ruma liu-liu krime sira ne'ebé fo prejuizu boot ba estadu no povu, ezemplu hanesan krime korrupsaun.

“JSMP fiar katak kestaun sira ne'ebé comunidade sira kestiona nu'udar forma ida hosi manifestaun hosi valor demokrátiku hosi sosiedade no husu ba entidade relevante sira atu toma konsiderasaun. Liu-liu atu hola asaun ruma hodi prova ba comunidade sira katak preokupasaun no lamentasaun sira ne'e la-loos”, dehan Diretór Ezekutivu JSMP, Luis de Oliveira Sampaio.

Iha JSMP nia sesaun esklaresimentu, JSMP esplika no rekoñese duni katak produtividade parlamentu ladun efetivu tanba Parlamentu Nasional la iha programa lezislasaun nasional, dependénsia ba asesór internasionál no número asesór internasionál rasik limitadu no halo viazem ba estranjeiru barak liu. Relasiona ho kestaun imunidade JSMP esplika katak, imunidade

membru parlamentu sira ne'e bele hasai bazeia ba Rejimentu Interna Parlamentu Nasional tuir artigu 94 (2) Konstituisaun.

Iha abertura no enseramentu, Xefe Suku Sanirin, Sr. Agosto Dato Buti, haktuir katak nia ho nia comunidade prontu kolabora ho organizaun sira, atu hasae no hametin kapasidade lider komunitaria sira, joventude no comunidade sira iha jerál.

Aliende ne'e, xefe suku mós agradese ba JSMP, ne'ebé lori informaun demokrasia ne'e no oinsa sira bele partisipa iha prosesu halo lei. Programa ne'e ajuda sira hatene diak liu tan kna'ar orgaun soberanu sira nia servisu. Liutan nia mós husu ba partisipante sira atu kontinua hatutan informaun sira ne'e ba maluk sira ne'ebé la-hetan oportunidade hodi partisipa iha treinamentu ne'e.

Treinamentu ne'e realiza ho apoiu finanseiru hosi Embaxada Finlandia iha Jakarta-Indonézia.

Atu hetan informaun kompleitu, favor kontaktu:

Luis de Oliveira Sampaio  
Diretór Ezekutivu JSMP  
E-mail: [luis@jsmp.minihub.org](mailto:luis@jsmp.minihub.org)